

INUIT ATAQATIGIIT

INATSISARTUNI



18. november 2009

Inatsisartut suleriaasianni § 36, imm. 1 naapertorlugu matumuuna imaattumik Naalakkersuisunut apeqquteqarpunga:
(Inatsisartuni ilaasortaq Harald Bianco, Inuit Ataqatigiit)

Naalakkersuisunut apeqqut:

1. Appat mitillu piffissat piniagaaffii sumiiffinni ilaatigut allanngortinneqarsinnaaneriniq Naalakkersusiut qanoq eqqarsaatersuuteqarpat ?
2. Tunumi appat mitillu piniagaasarnerisa killilersorneqarnerat allanngortinnilersaarneqarpa ?

Tungavilersuut:

Timmissat illersorneqarnerat pillugu nalunaarussiaq ukiut kingulliit tallimat ingerlaneranni sisamariarluni allanngortinneqarsimavoq, kingullermik martsii 2009 ukioq manna.

Uanga nammineq Tununuminngaaneerlunga allannguisoqaleraangat pissangarsimavunga Tunup immikkut isigisariaqarnera allannguutiniq allaanerusumik allannguiniq sunnuteqarsinnaanera ilaatigut naatsorsuutigisarsimagaluarakku, kisiannili taamaattangilaq.

Taammaattoqaraangat siulliullugu eqqaasarpara meeraallunga atuarnitsinni (nunaqarfinnguatsinni ajoqimik ilinniarsimasumik pikkorilluinnartumik ilinniartitsisoqarluta) nunalerutiniq sammisaqarnermi tupigusuutigisaratsigu paasillugu nunarsuatta anginerujussua. Minnerunngitsumik uagut kalaallit Nunatta aamma annertunerujussua pissutigalugu Nunatsinni atugassarititaasut assigiinngilluinnarsinnaanerat paasigaangatsigu tupigusuttarpugut.

Taamaattumik eqqarsartarpunga; Inatsisartuni ilaasortat Naalakkersuisullumi, kalaallit Nunatta annertunerujussua kiisalu annertunerujussuata nassatarisaanik piffinni atugassarititaasut assigiinngilluinnarsinnaanerat uatsituulli ilisimannigikkalulooq tupigisorujussuusarakku. Najukkatsinnili pissutsit pissusiviusut erseqqissumik ilisimaneqarsimasuugaluarpata, qularnarunangikkaluarpoq tamanna najoqqutarlugu taava qanoq iliuuseqartoqarsimassagaluartoq.

Naluneqanngitsutut Tunumi imartami sikorsuit ukiup ilarujussua matoqqatitsisarput, aamma tamatuma nalaani timmissat peeruttarput. Tassa decemberimiit maji

junilu ilannguttarlugit sikorsuaqartarpoq. Oqaatigissavara Ittoqqortoormiini sikorsuit suli takkutiaarnerusarmata.

Appat piniagaasarnerat pisarpoq; (Avannaani, Qaanaami Tunumilu) septemberip aallaqqaataaniit februarip naanera tikillugu. Mitit piniagaasarnerat pisarpoq; (Avannaani, Qaanaami Tunumilu) oktoberip aallaqqaataaniit martsip naanera tikillugu. Piffissamilu taakkunani piniartunut aallarnermi ataatsimi 30-it pisarineqarsinnaatitaapput, kiisalu sunngiffimmi aallaaniartartunut aallarnermi ataatsimi 5-it pisarineqarsinnaatitaallutik.

Oqaatigereerpara Tunumi sikorsuit (Tasiilami) decemberimi takkuttartut. (Ittoqqortoormiini qaamatip ataatsip miss. siulliullutik) Tassalu taamaaligaangat timmissat tammartarput. Imaapoq; timmisat piniagaaffii nunarsuatta pissutsimigut killilersuineranik tappavani timmiarniarsinnaaneq kitaaniit piffissap affaanik sivikinnerusarpoq. Aamma oqaatigissavara, ukiat tamaasa Tasiilap eqqaa appaqarneq ajormat. Eqqaamasakkut ukiut 40-50-it ingerlaneranni ukiut qulit missaannaat appaqarfiusartutut oqaatigineqarsinnaammat. Tassami ukiat ilaanni appat ataasiakkaaginnanguit takussaasarput, ilaannikkut takussaavinnatik, qaqu-tikkullu appaqarluartarluni.

Ataatsimut oqaatigalugu Tunumi appanniartarneq minnerpaannguakkulluunniit nungusaataangilaq, qulaani taakkartukkakka pissutaallutik timmiarniarneq killilersuinermiluunniit annertunerusumik silap pissusaa sikorsuillu annertunerusumik killilersuereermata.

Miteqarnera aalaakkaaneruvoq. Kisiannili aamma taakkuninnga piniarsinnaaneq appatuulli periarfissaq taannatuaannaavoq.

Eqqaalara nannut pillugit apeqquteqarninni eqqaasara tassalu, Tunup sineriarujussuani illoqarfiit imminnut ungasissorujussuummata, taamaattumillu piffissami sivikitsuinnarmi piniartoqartarmat.

Taamaattumik isumaqarluinnarpunga Tunumi timmissanik pisassaarnikkut killilersuineq pissutissaqanngilluinnartoq.

Nalunngilara aamma kitaata avannaani avannarpasinnerusumi timmissat piniagaarnerat piffinnut naleqqussartariaqartoq. Taanna kingusinnerusukkut uterfigiumaarpara.

Taamaattumillu paaserusuppara:

1. Appat mitillu piffissat piniagaaffii sumiiffinni ilaatigut allanngortinneqarsinnaanerini Naalakkersusiut qanoq eqqarsaatersuuteqarnerisut ?
2. Tunumi appat mitillu piniagaasarnerisa killilersorneqarnerat allanngortinilersaarneqarnerisut ?